

Belia diterap kemahiran penting menerusi program UPMKB-TEGAS

BINTULU: Golongan belia diterapkan kemahiran penting cara berkomunikasi dalam mencari pekerjaan dan mendepani cabaran masa depan melalui Program Youth Leadership and Entrepreneurship (YLE) Workplace Readiness di sini, baru-baru ini.

Program anjuran Universiti Putra Malaysia Kampus Bintulu (UPMKB) dengan kerjasama Tabung Gagasan Ekonomi Anak Sarawak (TEGAS) telah berlangsung pada 12 Disember lepas di TEGAS Digital Innovation Hub, Paragon Bintulu.

Jurucakap penganjur berkata, program tersebut bertujuan untuk melengkapkan golongan belia dengan kemahiran penting sebelum menceburi alam pekerjaan.

Katanya, peserta yang menyertainya terdiri daripada para pelajar UPMKB dan Kolej Vokasional Bintulu telah diterapkan dengan kemahiran penting seperti

komunikasi berkesan, penulisan resume dan teknik temu duga.

“Antara sesi yang turut memberi impak dan perspektif berbeza pada peserta adalah pengetahuan praktikal dan latihan langsung mengenai imej profesional bagi meningkatkan peluang mendapat pekerjaan dan pembentukan identiti diri belia,” katanya dalam kenyataan di sini, semalam.

Beliau berkata, penceramah jemputan yang hadir bagi menyampaikan perkongsian penuh inspirasi ialah Fakhzan Buang yang mengupas tajuk ‘Image Impact: Polish Your Professional Persona’, Joyce Morris Kapong dengan topik ‘Elevate Your Resume to New Heights’ dan Noor Hakim Ahmad yang membincangkan aspek ‘Navigating Interviews with Confidence’.

Sementara itu, Ketua Penyelaras Program Nur Asyiqin Zaidi berkata, pihaknya melahirkan rasa bangga atas

kejayaan program ini yang mendapat sambutan positif dan memberangsangkan daripada para peserta.

“Peserta turut memberikan maklum balas yang baik dan meminta agar lebih banyak siri program seperti ini dianjurkan pada tahun hadapan,” katanya

Beliau berkata, selaku penganjur, pihaknya amat berbesar hati dengan sokongan padu daripada peserta dan akan menganjurkan lebih banyak program yang berimpak tinggi serta bermanfaat khususnya kepada golongan belia.

Program ini juga hasil kolaboratif UPMKB dan TEGAS Smart Partnership melalui YLE UPMKB yang mana TEGAS bertindak sebagai penaja utama program dengan menyaksikan komitmen kedua-dua pihak membangun kemahiran belia Sarawak untuk memenuhi keperluan pasaran kerja yang semakin mencabar.



KOLABORATIF: Golongan belia yang menyertai program merakam gambar bersama para penceramah dan pihak penganjur.